



## Միքայել Նալբանդյան

### Կնդուկ պոչատի և նորա Սանչոյի մկրտությունը

«Կնդուկ պոչատն է գալիս,  
Ճամփա տուր, է՛, մե՛ր տղա,  
Տե՛ս, հետն էլ ո՞ւմ քաշ տալիս» .  
Աստվա՛ծ, ճի՛շտ Սանչո Պանսա:  
«Ասա՛, Հաճի Կարապետ,  
Ո՞ւր են կիտվել այդ հիմարք,  
Ուզում են կռվե՞լ մեր հետ .  
Ա՛հ, խելագար ապստամբք:  
Ուզո՞ւմ են, որ մի խոսքով  
Դորանց դժոխք ուղարկեն,  
Կամ նգովքի շանթերով  
Շան սատակնե՞րը հանեն»:  
Տե՛ր իմ, խնայե՛, հոգևոր  
Մի՛ տալ պատիժ խիստ սաստիկ .  
Մի՞թե չկա մարմնավոր  
Մի ուրիշ հնար փոքրիկ .  
Մի թուղթ, մի պատիկ նամակ . . .  
Մի քանի սո՛ւտ . . . ի՞նչ վնաս . . .  
Մյուսներին էլ օրինակ . . . —  
Խոսքը բերանը մնաց:  
«Տո՛, այդ կնդուկ պոչատին  
Քաշեցեք կարե կարաս,  
Մի բաբաթի մկրտվին

Մանչու հետ, փառաց ի փառս»:

Լոթին գոռաց այն կողմից,

Մանչու լերդին ջուր գնաց .

Մոզին էլ չտվե՞ց մի կից,—

Գլո՛ւնձ ի կայրե կարաս: